

Fecha nobo pa tratamiento di caso di apelacion de Meza contra OM

Tratamento di e caso di apelacion di parlamento y candidato pa minister Mike de Meza contra Ministerio Publico (OM), cual a keda posponi te proximo aviso, tin fecha nobo. E tratamento di e caso di apelacion lo tuma luga awor diamars 4 di augustus.

Manera ta conoci diamars 29 di juli mester a tuma luga e tratamento di e caso di apelacion cu de Meza a entama conta OM. Esaki a keda posponi despues cu e sistema di IT di Corte Comun di Husticia a keda afecta pa un virus. Esaki a causa cu audiencia di algun caso a keda posponi temporalmente, entre nan esun di de Meza contra OM.

Siman pasa a detecta e virus den e sistema di corte, y pa motibonan di seguridad, a pone e computer afecta online. Den noticieronan di Corsou a informa cu e esfuersonan di recuperacion tabata andando, pero a sigura cu tur informacion a keda

safe y no a keda comprometi. Ainda e origen di e virus ta desconoci. Segun informacion publica den un medio di comunicacion local, abogado di parlamento de Meza, Desiree, a indica cu e fecha nobo pa e tratamento ta bira diamars 4 di augustus pa 2or di atardi y manera ya caba anteriormente indica e tratamiento di e caso aki lo sucede tras di porta cera.

Manera ta conoci e trayecto di proceso di screening di candidato pa minister Mike de Meza a ser alarga pa motibo di diferente contratiempo cu a pone un impasse den e nominacion di de Meza, cual ainda e candidato pa minister y su ekipo legal ta luchando pa resolve.

Dia 17 di juli ultimo hues a entrega su decision relaciona cu peticionnan cu de Meza a entrega na Corte den Prome Instancia. E peticion di e ex-minister, ken actualmente ta den nominacion pa bira minister den e gabinete nobo di

AVP-FUTURO, ta pidi pa clarificacion tocante e tipo y e motibo di e acusacionnan cu Ministerio Publico (OM) tin contra dje. Ademá, de Meza a pidi OM pa tuma un decision si ta persigue of no prome cu 15 di augustus 2025.

Den su decision hues a splica cu OM a cumpli cu e decision di Corte di 25 di juni 2025, door di informa Mike de Meza riba e mesun dia ey cu e ta sospechoso den un investigacion cu tin andando y a pon'e na haltura di e articulo den ley riba cual e sospecho contra dje ta basa. Tambe hues a rechasa e peticion pa OM duna contesta prome cu 15 di augustus tocante un posible persecucion. Segun hues, e peticion aki ta di considera prematuro.

E tratamento di e caso di apelacion ta enfoca riba e dos puntonan primordial cu de Meza ya a presenta den corte. Primeramente de Meza y su ekipo legal ta pidi pa OM informa exactamente kico ta e



acusacion(nan) cu tin contra de Meza, y no simplemente e articulo den ley pa cual e ta sospechoso. E otro punto den e caso di apelacion ta cu de Meza y su ekipo ta pidi pa duna un fecha pa dicidi si tin suficiente prueba pa persigue.

E hues cu a rechasa e peticionnan mas recien di de Meza ta mesun hues cu a tuma decision prome biaha, pues segun abogado Croes tabata logico cu e hues lo no a cambia su decision. Aworaki den e tratamento di caso di apelacion tin tres diferente hues cu lo evalua si e decision

di e hues den prome instancia tabata corecto of si den caso cu nan ta evalua cu e decision no tabata corecto, pues lo por bay over pa cambia e decision aki.

Mientras tanto gobierno a nombra Sr. Gervais "Baba" Rene Herdê como minister temporal cu lo tuma cartera di Infraestructura, Energia y Telecomunicacion—originalmente reserva pa de Meza. Prome cu e nombramento di Herdê, dr. mr. Arthur Dowers tabata encarga cu e carteranan aki.

Sistema di Parlamento di Aruba afecta pa virus

Recientemente Parlamento di Aruba a informa cu un di nan cuentanan di email a keda comprometi y ta ser usa como un strategia di phishing cu ta diseñá pa horta informacion sensitivo cu por tin consecuencia serio.

A traves di un publicacion riba nan pagina oficial di Facebook Parlamento di Aruba a informa cu nan a ricibi un notificacion cu e email di phishing aki ta circulando. E organo mas halto di Aruba a pidi tur persona cu ricibi un email sospechoso for di nan pa por favor no habri esaki.

Caracteristicanan di email di phishing

Si un persona of compania ricibi un email cu e siguiente caracteristanan, ta trata di e email di phishing. E email ta carga como topico: Confidential File Portal sent you ProposalReview_and_Approval for Parlamento di Aruba y e remitente cu ta ser usa ta e email Julie.***@parlamento.aw

E email ta contene un attachment cu tin e mesun nomber cu e topico. Ta pidi pa por favor no habri e attachment aki ya cu e por contene un virus of un software dañino.

Parlamento ta indica cu si ricibi e email aki, loke mester ta haci ta ignora esaki completamente y elimina e email for di e inbox. Nan ta pidi tambe pa informa e Departamento di IT of tema di seguridad.

Por ultimo Parlamento ta duna algun tip importante cu por yuda evita cu personanan ta cay den e scam aki. Ta importante pa semper paga tino cu email for di remitente no conoci of email cu ta straño y mira si e remitente ta di un fuente legitimo. Nan ta conseha pa usa password fuerte y unico pa tur cuenta y keda alerta.

Parlamento a sigura cu nan ta trahando activamente pa investiga e incidente y restaura seguridad den nan sistema.

Prome Corte y awor Parlamento

Ta poco apenas algun atras cu Corte Comun tambe a informa cu nan sistema di IT a keda afecta pa un virus. Pa motibo di esaki varios audiencia mester a keda posponi. Segun informacion siman pasa nan a detecta e virus, y pa motibonan di seguridad, a pone e computer afecta offline.

Ainda e origen di e virus ta desconoci.

From: Julie <Julie.***@parlamento.aw>
To: Julie <Julie.***@parlamento.aw>
Cc:
Bcc:
Date: Thu, 31 Jul 2025 11:24:17 +0000
Subject: Confidential File Portal sent you ProposalReview_and_Approval for Parlamento di Aruba

 **Adobe Acrobat Sign**

Hello,

Enclosed, please see attached fax message for your review and approval.

VIEW COMPLETED DOCUMENT

Received & processed: Thu, 31 July 2025 - EDT
Pages: 2
Resolution: 200x200 DPI

Julie

Julie.***@parlamento.aw

copyright @ 2025 **Parlamento di Aruba**. All rights reserved.